



Synfocity = 817

mail us at : mzsynfo@gmail.com; mizoramsynod@gmail.com - Phone - 2314648

November 4, 2021

- ☐ **Synod hnuai Board leh Committee peng hrang hrang an thu**
 Synod Inkhawmpui atana Board leh Committee peng hrang hrangte inruahman lawkna Committee chu Oct. 18, 2021 (Thawhtanni) atang khan neih chhonzawm zel a ni.
 Nov. 1, 2021 (Thawhtanni) khan Synod Trust committee, Nov. 2, 2021 (Thawhlehi) khan Synod Social Front committee, Nov. 3, 2021 (Nilaini) khan Synod Worship committee, Nov. 4, 2021 (Ningani) khan Partnership committee an thu. Meeting hrang hrang hi Synod Moderator Rev. Dr. C. Lalhlira'n a kaihruai a, Meeting-ah hian Secretary report leh Treasurer report te, agenda dangte leh Synod inkhawmpuia report tur Secretary-in a buatsaih te sawiho thin a ni a. 2022 - 2023 Budget ruahmanna pharh a ni bawk.
 Nov. 9 - 11, 2021 chhungin Synod Executive Committee (SEC) an thu ang.
- ☐ **Khawvel Sunday School Ni**
 Nov. 7, 2021 (Pathianni) hi Khawvel Sunday School Ni a ni a. Kumin Khawvel Sunday School Ni-ah hian Mizoram Presbyterian Kohhran chuan puitlingah "Sunday School chanchin" Rev. Dr. B. Lalnunzira ziah an zir ang a. Intermediate - Senior-in "John Newton-a chanchin" Upa Hrilthansanga ziah an zir ang a, Beginner - Junior-in "Graham Staines-a chanchin" Rev. Vanlalrova Kiangte ziah an zir ang.
 Sunday School hi kum 1780-ah England ram, Gloucester khuaa Robert Raikes-a din a ni a. Dodalna nasa tak hnuai bul tan ni mah se Sunday School hi mi chanhaiten zirna an dawn theihna hmasa ber a nih avang leh Sunday School kaite nunah danglamna nasa tak an hmuh avangin a darh zau zel a. A tira hmusit taka elsentute ngei chuan, "Robert Raikes-a hian Gloucester khuaa sihal rualte chu beramnoah a chhuah vek a ni," an ti hial a. Pawi khawihna tla hniama jail tang an tlem tak em avangin Gloucester khua leh a chheh vela dan lekkawhtu leh thubuai remtu inzawm khawmte chuan kum 1805-ah Robert Raikes-a hnenah inthuralin lawmthu sawina lehkha an thawn hial a ni.
 India ramah July 9, 1803 atangin missionary ropui William Carey-a leh a thiante (Serampore Trio) hma laknain Sunday School neih tan a ni a. Mizoramah pawh Zosap Rev. D.E. Jones-a (Zosaphlua) hma laknain February 20, 1898 atangin mei mit lovin kan nei zui ve ta a ni. Synod Inkhawmpui Vawi 97-na Report-a a lan danin tunah hian MSSU hnuai Sunday School 1032, Hotute 4562, Zirtirtu 46866 leh Zirtu 370937 an awm mek a ni.
 October 2021 thleng a Sunday School chawimawina hrang hrang te pek tawh dan hetiang hi a ni-
- | Hming | Dawng | Zat |
|-----------------------|-------|-------|
| Pi Zaii Award | - | 20900 |
| Pi Zaii Special Award | - | 1386 |
| Zalawra Award | - | 21632 |
| Zalawra Special Award | - | 1852 |
| Diploma Award | - | 10235 |
| Jubilee Award | - | 1339 |
- MSSU Committee (Feb. 16, 1944:5)-in a rel angin Mizoramah chuan kum 1944 atangin Khawvel Sunday School Ni hman tan a ni a, 1949 atangin November Pathianni hmasa berah thupui neia hmang tanin kum 2001 atangin puitling leh naupang lam ten zirlai hran an zir tan a. MSSU Committee (Oct. 24, 2018)-in a rel angin kum 2019 atangin naupang lam chu hmun hnih - Beginner - Junior leh Intermediate - Senior-ah te then a ni.
- ☐ **Synod Relief Fund**
 Tun hnaia harsatna nei Kolasib Venglai a khawsak harsa chhungkaw 1 hnenah Synod Relief Fund atangin chhawmdawlina Rs. 8,000/- pek a ni.
- ☐ **Zin**
 Nov. 5 & 6, 2021 chhung hian Champhai-ah Synod Rescue Home, Lungphum phum turin Rev. K. Lalrinmawia, Executive Secretary leh Synfo Staff - Pu Peter Lalanpuia leh Pu David Lalruattluanga te an kal ang.

□ **Synod Mission Board leh ram pawn chet velna**

◆ **Odisha Mission Field**

Gandahuery khuaah Biak In hawn a ni.

Oct. 30, 2021 (Inrinni) khán Gillakuta Pastor Biala Gandahuery khuaah a hmasa ber atan Biak In thar chu Field Secretary-in a hawng. Biak In thar lawmna atan bâwng 2 leh ar 35 kgs talhin hlim takin ruai an theh a ni.

Gandahuery khuaah hian Gillakuta khua a mi ten Pathian thu an va hril thin a, dodâlna leh vauna tam tak kârah hmeithai pakhat Pi Dukhi-Ma chu, kum 2007 khán ringtu-ah a inpe ta a. A hming pângngai chu Pi Promilla a ni. Amaherawhchu a khuaten ringtu anih avanga tihduhdahna chi hrang hrang an tawrh tir avangin Dukhi-Ma tih hming hi a pu ta a. Kum 2/3 liam ta aţang khan ţawngţai rawngbawlina nasa zâwka a kalpui avangin "Prarthana-Ma" tiin koh a ni ta zâwk mah a. Amah chauh hian, kum 2007 aţanga 2016 thleng khan, an khuaa ringtu awm chhun a ni. 2016 kum tâwp lam khan Tv. Ramakanto leh Tv. Prasant te chu ringtuah an inpe ve leh ta a. Kristian-a an inpek avang hian an chhungten nasa taka tiduhdahin in aţanga hnawhchhuah hial te pawh an tawk a ni.

An khua hi motor eng chi mah a lût thei lo va. An khua thleng tur hian kawng chho hliir 30 mins. vel kal ngai a ni. Kum 2016 a Odisha Mission Field hawn anih aţang khan enkawl that a ţul tih hriain 2017 aţang khan missionary ten an khua hi an vil ngun leh zual ta a ni.

Biak In neih an châk em em a, tuna Biak In sakna hmun hi Pi Dukhi-Ma ram a ni a, helai hmuna Biak In sak hi an khaw hotute hnena an han dil chuan an lo phal ta hlauh mai a. Phur em em in missionary ten hnatlâng te neihpuiin an rilru inhawn lai chuhin, 2019 khan Biak In sak chu bul ţan nghal thuai a ni a. Ringtu zingah anni tlangval te pahnih lo chu hmeichhia hliir an nih avangin an khawngaihthlak thei thin hle a ni.

Gandahuery khua hi In 27 an ni a, tunah chuan ringtu pawh an thahnem ta viau mai a, ringtu leh ring lo in awm pawlhna te nen In 6 lai chu ringtu In tia chhiar theih an lo ni ta a, fellowship member pawh 40 chuang lai an ni.

◆ **Barak Area Mission Field**

Oct. 31, 2021 (Pathianni) khan ringthar 1 Lal Isua zui turin a inpe.

Uttar Dhollaichera-a Kristian te tawrhna.

Uttar Dhollaichera hi Barak Area, Pailapool Bengali Biala awm a ni a, Kohhran tha tak niin Biak In pawh tha tak an nei a, member chhungkaw thenkhat hi kum engemawti aţang khan refugee-ho awmna tura Sawrkar-in a buatsaiha awmin in leh lo tha tak tak an din a. Tunhnaiah helai velah ringtu an lo pun chhoh tak avangin RSS ho thikthu a chhe ta deuh a, an awmna aţanga hnawhchhuah an tum a, 'hindu a an let leh anih chuan an awm zel thei ang, Kristian an nih chhunzawm zel dawn chuan October thla chhungin an insawn chhuak vek tur a ni' tiin thupek an ni ta a ni.

Kohhran member-te chu an mangang hle a, vanneihthlak takin helaia kan member pakhat chuan "Ka ram chhungah rawn inthiar lut vek rawh u" a ti ta hlauh mai a, tunah hian an awmna tur Maurap In te sak mek a ni a, ringtu hmasa te ang deuh khan ei leh in te inţawmin hma an la mek a, bial chhung evangelist ten riah chilhin an ţanpui a. Barak Area office lamin ţanpuina tlem a zawng an pe a, chu chuan chhungkaw 6 te tan rangva bundle 3 theuha insem turin an lei a, chenna tur an buaipui mek a ni.

◆ **Tripura Mission Field**

Fellowship thar hawn leh Ringthar

Oct. 29, 2021 (Zirtawpni) khan Sonkhola Para, Manirampur Pastor Bial, Tripura Mission Field-ah Fellowship thar hawn a ni a, Fellowship thar hawn inkhawmah hian ringthar 20 Lal Isua zui turin an inpe nghal a ni.

Oct. 2021 chhungin Tripura Mission Field-ah ringthar 77 an nei.

◆ **Nepal Mission Field**

Oct. 30, 2021 (Inrinni) khan 2 Lal Isua zui turin an inpe.

◆ **Jharkhand Mission Field**

Oct. 31, 2021 (Pathianni) khan ringthar 7 Lal Isua zui turin an inpe.

◆ **Arunachal & Assam Mission Field (East)**

Oct. 28, 2021 (Ningani) khan ringthar 2 Lal Isua zui turin an inpe.

◆ **Arunachal & Assam Mission Field (West)**

Oct. 31, 2021 (Pathianni) khan ringthar 1 Lal Isua zui turin a inpe.

- ♦ **Karbi Anglong Mission Field**
Oct. 31, 2021 (Pathianni) ringthar 6 Lal Isua zui turin an inpe.
Nov. 2, 2021 (Thawhlehni) khan ringthar 4 Lal Isua zui turin an inpe.
- ♦ **Home Mission North**
Oct. 31, 2021 (Pathianni) khan Thaidawr Pastor Bial chungga Zomuantlang Kohhranah ringthar 1 Lal Isua zui turin a inpe.
- ♦ **Home Mission South**
Oct. 31, 2021 (Pathianni) khan Vaseikai Branch Church-ah ringthar 6 Lal Isua zui turin an inpe.
- ♦ **Delhi Mission Field**
Oct. 31, 2021 (Pathianni) khan ringthar 15 Lal Isua zui turin an inpe.

□ **Sunna : Rev. Rokhuma, Kum 91**

Rev. Rokhuma hi Pu Kapthangvunga leh Pi Chhingtei te inkarah April 17, 1931 khan Thingdawl Mel 8-ah piang a, unau paruk an ni. Kum 1965-ah Pi Lalthanpâri nen an innei a, fa paruk, tu 13 leh tuchhuan 5 an nei.

Kum 1953 khân matric a zo a. Chumi hnuah Mizoram sawrkârah LDC hna a thawk a; dah ngheh (confirmed) a nih hnuah BA zir a duh avângin Delhi-ah a kal a, chutah chuan Finance Department-ah LDC hna bawk a thawk leh a. Sawrkâr hna thawk chungin zânah College a kal a, kum 1961-a BA a zawh hnuah B.D. zir chhunzawm nghalin tuang takin kum 1964-ah B.D. chu a zo ta a ni.

B.D. a zir zawh dawn kum 1963-ah Synod Inkhâwmpui chuan Champhaia Pro. Pastor hna thawk túrin a lo ruat a. Tichuan, kum 1964-a a zir zawh chuan Champhaiah a thawk ta nghâl a. Mahse, thla khat pawh a awm hmam Ramthar rawngbâwlina atân North East Frontier Agency (NEFA, tuna Arunachal Pradesh) rama Siang District-ah Private English Medium School-ah zirtirtu hna a zu thawk a. Heta a awm lai hian kum 1965 Synod Inkhâwmpui chuan kum 1966 Synod-a nemngheh túrin a reļ a. Tichuan, kum 1966 Synod Inkhâwmpuiah a nemnghet a. A thawhna ram Siang District-a Deputy Commissioner chuan Chanchin Tha hril nia a rinhleleh avângin kum 1967 tâwp lamah chuan a hnawt chhuak a, Aizâwlah a haw a. Mahse, kum 1967 Synod Inkhâwmpui chuan Mikir ram, Karbi Anglong-a thawk túrin a ruat leh a. A remchân ang anga Assam Phaitual Mizo Kristian (APMK) pawh enkawl túra tih a ni. Kum 1968 tírah Mission Veng Biak Inah an thlah nghe nghe. Mikir ramah chuan kum 1968-82 thleng, kum 15 lai an thawk a ni.

Kum 1982 Synod Inkhâwmpui chuan Missionary Training Centre-a Dean hna leh Ramthar Hostel-a warden hna thawk kawp túrin a ruat a. Kum 1985 & 1986 Synod Secretary-ah te, 1988-ah Moderator (hun pum ni lova thawk hnuhnung ber a ni), 1989-91 chhúng Senior Executive Secretary a chelh a; kum 1992-93-ah Missionary Training Centre enkawl turin Dean atân ruat a ni leh a, tichuan kum 1994-ah pension-in a chhuak ta a ni. A pension hnu 1995-1997-ah Synod Finance Officer hna a chelh leh a ni. Synod aiawhin Assembly Executive Committee member-ah te a awm a, Ecumenical Church Loan Fund member-ah te, Church's Auxiliary for Social Action (CASA) member bakah ZPMK a enkawl chhúngin inkhâwmpui Chairman hna te a thawk thin bawk. Ramthar Chanchinbu chhuah tirh 1984-2004 (kum 20) chung Editor a ni. A rawngbâwl chhúngin nupa tuak 86 a inneihfir a, mi 316 a baptis bawk.

Vanduai thlak takin Covid-19 a lo kai ve avangin Oct. 10, 2021-ah ZMC-ah dahin 25.10.2021-ah negative result neiin a chhuak a, a chuap leh a lungte check up a duh avangin ina haw loin Aizawl Hospital-ah luhpuiin ni 28.10.2021-ah tha takin a chhuak leh a, in lamah enkawl zui a ni. Oct. 31, 2021-ah a pum nuam loin thil ei chakna pawh a nei lo va, na chhawka te pea an inenkawl laiin Nov. 3, 2021 (Ningani) zan 7:05-ah Lalpa hnenah min chawhhsan ta a ni. Nov. 4, 2021 (Ningani) chhun dar 12 khan Rev. Dr. C. Lalhlira, Synod Moderator-in Mission Vengthlang Kohhran Biak Inah a vui. *(for more visit www.mizoramsynod.org)*

□ **Hruaina Eng FM Radio :**

NOVEMBER 5, 2021 (FM Zoawi - Aizawl & Lunglei @ 7:30 p.m.):

Zaipawl : Chanmari Bial Zaipawl - Ka chakna Lalpa
Solo : Nancy Zothanmawii - Rorelna Dik
Thusawi : Rev. Vanlazuata - Lal Isua zui
Solo : Laldusaki - Aw hmangaihna sawi thiam ila
Zaipawl : Chhinga Veng Kohhran Zaipawl - Chhandamtu nunnem leh ropui

❑ **Susamachar Prasaran Programme :**

NOVEMBER 7, 2021 (Pathianni) 5:00 pm. :

- Group/Choir/Solo** : Republic Veng Masihi Sangati - Falaksa
Group/Choir/Solo : Khatla Masihi Sangati - Ishu Tera Wada
Sermon : Rev. SB. Gurung- Samai Ka Sudh Upyog
Group/Choir/Solo : Hunthar Kohhran - Ibadat Karo
Group/Choir/Solo : P.C Lianhmingthanga - Sahara

❑ **Moderator leh Executive Secretary-te Programme:**

Rev. Dr. C. Lalhlira : Moderator

- Nov. 7, 2021 Bangalore Kohhran kum 10 tlin lawmna hmanpui
 Nov. 9-10, 2021 SEC
 Nov. 13-15, 2021 Khuangleng Bial

Rev. Lianhmingthanga Sailo : Senior Executive Secretary

- Nov. 9-10, 2021 SEC
 Nov. 12, 2021 Revival Committee meeting

Rev. B. Sangthanga : Executive Secretary

- Nov. 9-10, 2021 SEC

Rev. K. Lalrinmawia : Executive Secretary

- Nov. 5 & 6, 2021 Synod Rescue Home Programme, Champhai
 Nov. 9-10, 2021 SEC

MOTOR AUCTION

A hnuai tarlan Motor hi hralh tur a ni a, a lei duh chuan Rs. 1,50,000/- (cheng nuai khat leh singnga) aia hniam lovin mahni lei ngamna zat, address, phone number dik taka ziakin, chhanna chu envelope char thlapin a hnuai hming ziak hnenah thehluh tur a ni.

- Motor : Bolero SLX - MZ 01 H- 4032
 Last date of Submission : Dt. 12.11.2021 ; Dar 2 pm thleng
 Hawn Ni : Dt. 12.11.2021 ; Dar 3 pm
 A hmun : Senior Executive Secretary Room, Synod Office

A hawn nia awm ngei, a chhang sang ber hnenah pek a ni ang.

Sd/-

Rev. Lianhmingthanga Sailo
 Senior Executive Secretary
 Mizoram Synod

PRESBYTERIAN BIBLE SCHOOL (PBS) HRIATTIRNA

Presbyterian Bible School (PBS), Mission Veng, Aizawl-ah C.Th zir duh tan dilna form siam sa, Office-a leiin November 30, 2021 chhungin theh luh theih a ni. December 14, 2021 (Thawhlehi) chawhma dar 10-ah PBS Lecture Hall-ah Interview neih a ni ang. Hre chiang duh tan Phone no. 8210377892 / 9862322112 -ah zawhfiah theih a ni e.

Sd/-, Principal
 Presbyterian Bible School